



Zovine di schene, 1925, Salvador Dalí

“O voi a cjantâ pe vile!”

Le sintive da spessut cheste frase, di frut.

Cuant che un nol saveve ce fâ, al nunziave che ...al lave a cjantâ pe vile. Valadî a fâ nuie, a passâ il timp, a fâ passâ il timp. Robe cussì strane, par un furlan, che e coventave une frase di pueste par indicâle. Un furlan al cjate simpri alc di fâ. E se nol cjate nuie, si lu invente.

Ma la robe plui strane e jere che, pardabon, pe vile si cjantave. E si sivilave. Cuant che si lave in biciclete o a pît. A puartâ il lat, a cjatâ un amî, a viodi la partide. O sentâts in cime dal cjar dal fen

*“In chê sere jo ti ai viodude
a tornâ sul cjar dal fen
Di lontan po ti ai sintude
tu cjantavis cussì ben”*

Par no dî des ostariis, li che a si improvisavin coros maraveos di fâti restâ a orele vierte pal plasê di sintîju.

No sai vualtris, ma jo o met sul cont des pierditi che nus à purtât il 'progres' ancje chestis cjantosis disparidis.

Cumò pes stradis dai paîs si sint il rontâ di machinis simpri plui sfaçadis, di tratôrs simpri plui grancj come cjasis, il sot font di cualchi autostrade, il sturniment di chei che ti fasin il motocross sot dal nâs. Intes ostariis (pardon, cumò i vûl dit 'bars' o, mior ancjemò, 'wine bars') a son jentradis ghitaris che une volte cui savê ce robe che a jerin o, se no, diggei (si dîs cussì) tatuâts fin sul bugnicul e plens di rincjins che ti discjadenin cuintri toneladis di decibels.

E il cjantâ di une volte? Dulà isal lâ? Dome pal plasê di cjantâ, no impuarte se al è o no cualchidun a sintîti, no impuarte nancje se tu sês stonât. Plasê e vonde.

Mi crodarêso?

Vuê di matine, a siet, o ai sintût, di gnûf, cjantâ pe vile. Di no crodi e cundifat nancje jo no crodevi a lis mês oreli. L'aiar net, fresc, daspò di une gnot di burlaçs, la matine biele. Un zirut in biciclete, par movi lis rovuedis e ancje i muscui des gjambis, cualchi km, 8-10 nuie di ce. Dome pal gust di.

E o ai sintût a cjantâ, a cjantâ pe vile.

Sarà une radio, sarà un telefonin, un i-pod, un i-phone, un i-cja dal diaul. Une di chês robis di cumò.

Ma no! Al jere une jessi uman. Une femine. Nancje tant zovine e nancje cuissà ce biele. E lave pes sôs, pe vile. E e cjantave.

"Brave, siore!" o vares vût voie di sberlâi.

Ma no cjantave par furlan. E nancje par talian, ni par inglês. E cjantave in cuissà ce lenghe, e jere une imigrade. Nere.

Che e cjantave pe vile.

di Laurin Zuan Nardin